

ZELENA REVOLUCIJA SE DOGODILA U BiH

ZEOS U SURADNJI SA ŠKOLAMA PRIKUPIO 117.190 kg E-OTPADA

Zelena revolucija se dogodila u BiH! ZEOS eko-sistem (www.zeos.ba) je realizirao veliki ekološki projekt s učenicima iz devet kantona Federacije BiH. Učenici osnovnih škola su učili i radili na području zaštite životne sredine, prikupljajući e-otpad i osiguravajući čistu budućnost bez e-otpada za sve generacije.

Škole su pokazale veliko zanimanje za suradnju, te se umjesto planiranih 100, na javni poziv prijavilo 200 osnovnih škola. Time je [Zelena revolucija](#) postala jedna od najvećih ekoloških akcija u BiH. Čak 88 000 djece, s nastavnicima, roditeljima i građanima se kroz radionice na zabavan i kreativan način educiralo kako dati doprinos zaštiti životne sredine od e-otpada. A zatim su krenuli u akciju prikupljanja.

Sve škole su, od ZEOS-a dobile koševе za e-otpad i promotivni materijal, letke i plakate. Učenici, ali i građani, su za manje od tri mjeseca, prikupili 117 190 kg e-otpada. Najviše e-otpada, 4 812 kg, prikupili su učenici JU Osnovna škola „Harmani II“ Bihać (USK), zatim Osnovna škola „Harmani I“ Bihać (USK), 4 684 kg, te Osnovna škola „Meša Selimović“ iz Zenice (ZDK), 3 306 kg. Osnovna škola "Brestovsko", Kiseljak (SBK), čiji su učenici prikupili ukupno 2 954 kilograma e-otpada, osvojit će posebnu nagradu za najveću prikupljenu količinu po učeniku.

“Izuzetna nam je čast što smo realizirali jedan ovakav projekt i zaista pokrenuli Zelenu revoluciju, te osvijestili učenike, ali i građane koliko i zašto je bitno odlagati e-otpad na adekvatan način. Škole su pokazale veliko zanimanje i ozbiljno su pristupili realizaciji projekta. Od 1.2. do 31.5. 2022. godine prikupljeno je više od 100000 kg e-otpada što je mnogo više od očekivanog. Spremili smo i nagrade za najbolje. Prva je pametna ploča, druga projektor, a treća IT oprema za učionicu informatike - tastature, miševi i podloge”, kazao je Emil Šehić, direktor ZEOS eko-sistema.

Nagrade će službeno biti uručene u narednom periodu. A kako bi se zahvalili učenicima na sudjelovanju u Zelenoj revoluciji, ZEOS je odlučio da, u ovisnosti od količine prikupljenog e-otpada, svim školama donira sadnice za uređenje školskog dvorišta, ili općinskog parka.

Koševi za e-otpad ostaju kao poklon ZEOS-a osnovnim školama, a bit će organizirano i besplatno preuzimanje otpada. Ovo je još jedan način da se razvije legalna mreža prikupljanja otpada, te da se pravilno odlaganje približi stanovništvu.

Podsjećamo, elektro odnosno e-otpad skraćeni je naziv za stare ili pokvarene električne i elektronske uređaje i opremu koja se više ne koristi, kao što su: mikrovalna pećnica, tastatura, monitor, mobitel, televizor, i ostali uređaji koji rade na struju ili baterije.

E-otpad potpada pod opasni otpad, jer sadrži mnoge štetne tvari i ukoliko se ne odlaže pravilno, njegove opasne supstance mogu zagađati tlo, zrak i vodu, te na taj način postati dio lanca ishrane. Stoga ga nije dozvoljeno odlagati zajedno s ostalim otpadom iz domaćinstva, već je potrebno izdvojiti ga, i odložiti u neki od ZEOS-ovih uličnih kontejnera, koji se mogu pronaći na karti putem web stranice www.zeos.ba.

Reciklažom e-otpada nastaju vrijedne sirovine koje se vraćaju natrag u proces proizvodnje novih uređaja, čime se značajno smanjuje eksploatacija prirodnih resursa.